


"Pa e motibo aki nos no ta perde curashi, pasobra aunque fisicamente nos ta bayendo atras, spiritualmente nos ta keda renoba kada dia."

2 Cor. 4:16

Cu inmenso dolor y tristesa nos ta anuncia fayecimento inespera di nos inolvidabel casa, tata, ruman, welo, amigo y colega:



**Pieter Pronk**

Mihor conoci como "Piet"

\*11 april 1941 - †17 januari 2016

**Na number di su**

**Casa:** Tiny Pronk-de Boer  
**Yiunan:** Kitty, Michael y Morris (Hulanda)  
Annemarie, Bryan y Steven  
Yolanda

**Rumannan:** Nel, †Rob Gigengack y famia (Hulanda)  
Betty, †Albert Niemeijer y famia (Hulanda)

**Swa y cuñanan:** †Cor de Boer y famia (Hulanda)  
†Bert de Boer y famia (Hulanda)  
†Nel, Ton Boerebach y famia (Hulanda)  
Jaap, †Wil de Boer, Hetty Willemsse y  
famia (Hulanda)

**Mihor amigo(a)nan:** Mike, Doina Eman y famia  
Eddy, Freda Croes y famia  
Dolf, †Marie-Josée y famia  
Harry, Monica Oplaat y famia  
Gerrit Grondsma y famia (Hulanda)  
Stijn Janssen y famia (Curaçao)  
Rene Herdé y famia  
Sharin Luydens  
Elva Angela y famia  
Felecita Croes y famia

Nos ta invita tur famia, amigo(a)nan, conocirnan, bisiñanan y coleganan pa asisti na acto di entierro cu lo tuma lugar diabierna 22 di januari 2016 pa 4'or di atardi na Kerki Protestant na Playa. For di 2'or e restonan mortal di nos defunto stima lo ta reposa den Kerki. Dominee Hazenoot lo kuminsa su sirbishi pa 4:45 y despues lo sali pa santana Protestant na Piedra Plat.

Oportunidad pa condolencia ta riba diahuebs 21 di januari 2016 for di 6'or pa 9'or di anochi na Aurora Funeral Home, Cumana 76.

Nos ta pidi nos disculpa si den nos dolor y tristesa nos por a lubida di menciona number di un of mas persona.

Depues di entierro ta prefera di no ricibi bishita di condolencia na cas.

## IN MEMORIAM

### Sr. mr. drs. PIET PRONK

Diadomingo 17 di januari u.p. pa exactamente 11'or i 33 minuut Piet Pronk a hala su ultimo rosea y consecuentemente a tuma despedida di su bida na e mundo aki. Un bida cu tabata di hopi nificacion, tanto pa e mes, pa su famia y amigonan, pa nos pais y sigur tambe pa tur e gruponan cu su interes e l'a yuda cuida pa asina tanto aña manera e sindicato di maestronan di Aruba, antes VLA, awo SIMAR.

Piet a yega Aruba na aña 1972 cu su famia (señora-esposa y dos yu muhe) for di Surnam. Masha lihe Piet a sinti'e parti di Aruba, comunicando na Papiamentu, absorbiendo e cultura di Aruba y nunca mas a bandona Aruba. E di tres yu muhe di Piet a nace na Aruba, a lanta, crece, studia na Aruba y mescos cu e di dos yu muhe, ta trahando keto bai na Aruba.

Ya caba un par di dia despues di a yega Aruba Piet tabata na un reunion di VLA, e sindicato di maestronan di Aruba cu despues a cambia den SIMAR y espontaneamente a ofrece pa yuda. Piet a join e comision encarga cu problemanan di posicion huridico di e miembronan y di momento ey e l'a keda asisti e sindicato pa hopi aña cu a sigui. Si nos drenta den historia di e sindicato nos lo topa cu Piet na hopi ocasion, principalmente na momentonan cu batayan fuerte mester a wordu hiba y na e añanan 70 y 80 hopi bataya meste a wordu hiba. Piet su curason y pasion pa enseñansa tabata e motibo y e estimulo pa Piet keda asisti e sindidato di maestro cu conseho pa hopi añanan despues tambe. Simar tambe a comparti hopi momentonan cu Piet durante Dialogo Social, caminda Piet su aporte y contribucion tabata significativo. Di acuerdo cu su karakter Piet tabata un persona sumamente kritiko pa loke tabata pasa na Aruba en general, den enseñansa y tambe naturalmente den SIMAR y semper e tabata expresa su opinion na un manera skerpi.

Piet durante su trabounan na Aruba a logra un carera digno di menciona. Ela cuminsa na aña 1972 como docente di matematica y fisica na Colegio Arubano, a bira despues conector na e mesun scol, a pasa pa bira rector na Universidad di Aruba y despues consehero di diferente minister di pais Aruba. Piet durante e periodo cu e no a fungi como consehero di ministro a activa su oficina di consulta huridico y a duna conseho na individuo- y organisacionnan. Durante Piet su trayectoria na mundo tur colaborado cu e l'a topa pa un of otro motibo seguramente a keda cu un impresion positivo di dje: un persona sumamente severo, pero husto y integro, un trahado incansabel, semper cla pa busca un solucion satisfactorio pa tur partido.

Apesar di un bida basta ocupa pa motibo di su actividadnan, Piet a haya of traha tempo pa saca un buki caminda Piet hunto cu otronan a compila e leyman importante y hopi uza bou di e titulo "Basisregelingen uit het Arubaanse Staats- en Bestuursrecht". Durante Piet su estudio di hurista ela sinti falta di un compilacion di ley asina y a dicidi pa prepara e compilacion aki. Den practica e buki aki ta hopi uza, tanto pa studentenan como pa otro huristanan cu ta trahando caba como tal.

Dispidiendo di Piet SIMAR tin cu expresa publicamente cu nos meste ta orguyoso y sinti nos mes bendiciona di a conoce Piet asina di cerca y cu nos por a risibi su contribucion pa asina tanto aña na beneficio di e miembronan di Simar, di e maestronan di Aruba en general, di enseñansa na Aruba y di pais Aruba. Piet no a sera su mes den su cas na Shiribana, pero semper a para cu dos pia den nos comunidad y a participa na tur desaroyo cu ta tumando lugar na Aruba. Aruba lo bai haya su falta sigur.

Indudabelmente Piet su morto ta laga un bashi grandi atras, na prome luga den su famia directo, su señora-esposa, yu- y nietonan, otro famianan, su amigo- y conocirnan, pero tambe cerca esnan cu tabata depende di e tantísimo trabounan cu Piet tabata produci.

Piet sosega na pas.

Aruba, 21 di januari 2016.